

I.

Unsers allergnädigsten herrn, des römischen künigs erzny
zu der pestilencz.

An dem ersten nym an Ay, und schlach ain löchly dar jnn am spicz, und thu daz wis daruss und laus den totter dar jnn bliben. Nym darnach ungestossen saffran, und füll daz ay da mit so vil du magst darin bringen und füll daz löchlin wyder zu mit ainer ander schallen, und druck die selben schalen uff daz löchlin, su blibt sy daran hangen, und leg daz ay zu dem für und laus es langsam bratten, uncz die schal gancz bron wirt an allen enden, und nym dar nach daz ay und zerustus es jn ainem morsel mit der schalen, bis das man die schalen nit mer kent oder sicht. Nym dar nach wissen senf samen als schwer, als daz ay mit dem saffran wigt, und stuss denselben och klain zu mell. Item darnach nym $\frac{1}{2}$ latt wissen diptam $\frac{1}{2}$ latt dormitill j quintlim kronäglin, die driw sult du yedes jr sander gar klain stossen zu mell, und temperier die gemelten bulfer alle under ain ander. Nym darnach so schwer gut dryax, als die vor gemelten bulver alle sind, und stoss die gemelten bulfer, und dryax by zwo stunden lang nach ain andren, oder lenger uncz an dem stempfel hanget und ain lattwärg darusz wirtt, die selben lattwürgen solt du behalten jn ainer buchs, die ist gut xx oder xxx jar, oder lenger.

II.

Die allerdurchleuchtist etc. Ferdinandus und Anna etc. haben die hernach benanten künigl. kinder in elichem stand durch gnad gott des almechtigen mit ain anderen erobert:

Das erst mit namen Elisabeth ist geboren worden zu Lincz an ainem montag den 9 tag julii zwischen 4 und 5 ur vormittag im 1526. jar in zaichen des krebs, ist kunig sigmundt august von poln verheiratet.

Das ander mit namen Maximilian ist geboren worden zu Wien an ainem freytag den 1 tag augusti zwischen 1 und 2 ur vormittag im 1527. jar in zaichen der wag.

Das tritt mit namen Anna ist geborn worden zu Prag an ainem eritag den 7 tag julii zwischen 4 und 5 ur vormittag im 1528. jar im zaichen des stieres, ist herzog albrecht von peyern verheirath und hat hochzeyt gehebt zu Regenspurg den 4 tag julii 1546.

Das viert mit namen Ferdinandus ist geborn worden zu Lincz an ainem montag den 14 tag Junii umb 3 ur nachmittag im 1529. jar im zaichen der wag.

Das fünfft mit namen Maria ist geborn worden zu Prag an ainem montag den 15 tag maji umb 12 ur nachmittag im 1530. jar im zaichen des stiers, hat zu Regenspurg mit herzog Wilhalmen von Cleff und Julich hochzeit gehabt den 18 julii 1546.

Das segst mit namen Magdalena ist geborn worden zu Ynspruck an ainem mittwoch den 13 augusti zwischen 8 und 9 ur nachmittag im 1532. jar im zaichen des wassermanns.